

Capitulu 7

Induve Tistù hè cunfidatu
à u Sgiò Trunadisse
chì li dà una lezziò d'ordine

Forse chì u carrateru splusivu di u Sgiò Trunadisse li venia d'avè troppu battutu incù i cannoni.

U sgiò Trunadisse era l'omu di cunfidenza di u Sgiò Babbu. U sgiò Trunadisse curava i numarosi impiegati di l'usina è tutte e mane i cuntava per assicurà si ch'ellu ùn li ne mancava unu ; lampava un ochju dentru à i cannoni per vede s'elli eranu bè diritti ; s'assicurava a sera di a chjusura di e porte, è à spessu, travagliava tardi di notte per cuntrullà l'alighamenti di i sciffri indù i libroni duv'elli si facianu i conti. U sgiò Trunadisse era omu d'ordine.

Eccu perchè chì u Sgiò Babbu avia pensatu à ellu per perseguì toccu u lindumane, l'educazione di Tistù.

– Oghje lezziò di cità è lezziò d’ordine !
mughjò u Sgiò Trunadisse, arritu indù l’usciale*
cum’è s’ellu s’era addirizzatu à un regimentu.

Ci tocca à dì chì u Sgiò Trunadisse, nanzu
d’esse in li cannoni, era statu à l’armata è s’el-
lu ùn avia inventatu a polvera, sapia o mancu
ghjuvassine.

Tistù si fece sculiscià longu à a ringhera.

– Ricullate, li disse u Sgiò Trunadisse, è falate
per e scale.

Ben ch’ella li parse inutile di ricullà per rifalà,
postu ch’ellu era digià quaghjò, Tistù ubbedì.

– Chì purtate in capu ? dumandò u Sgiò Tru-
nadisse.

– Una barretta à quadretti

– Allora mettite la diritta !

Ùn pensate chì u Sgiò Trunadisse era gattivu
omu, avia solamente l’arechje assai rosse, è per
un sì o per un innò, li piacìa à ammuscià si.

« Averia preferitu cuntinuà a mio educazione
incù Mustaccione » pensava Tistù.

È si messe per strada incù u Sgiò Trunadisse.

* vestibule

– Una cità, principiò u Sgiò Trunadisè, chì avia appruntatu a so lezziò, si cumpone, cum'è vo a pudete custattà, di carrughji, di munumenti, di case è di persone chì campanu in isse case. Secondu voi, chì ghjè u più impurtante in una cità ?

– U giardinu di e piante, rispose Tistù.

– Innò, rispose u Sgiò Trunadisè, u più impurtante in una cità ghjè l'ordine. Prima, avemu da visità u munimentu induv'ellu si mantene l'ordine. Senza ordine, una cità, un paese, una sucetà ùn sò chè ventu è ùn ponu durà. L'ordine hè un affare di primura è per tene l'ordine, ci vole à punisce u cumbugliu !

« Averà a raggiò u Sgiò Trunadisè, pensò Tistù, ma cumu hè ch'ellu mughja cusì forte ? Eccu una persona maiò chì hà una voce di trumbetta. Ci sarà bisognu di fà tantu rimore per via di l'ordine ? »

Indù i carrughji di Mirepoil, a ghjente si girava, i fighjava, è Tistù ne era fastidiatu.

– Tistù ! ùn vi lasciate distrae. Cosa hè l'ordine ? Dumandò u Sgiò Trunadisè d'una voce severa.

– L'ordine ? Ghjè quandu chì omu hè cuntentu disse Tistù.

U Sgiò Trunadisce fece, « um ! », è e so arechje turnonu ancu più rosse ch'elle ùn eranu di regula.

– Aghju rimarcatu, cuntinuò Tistù senza lasciassi intimurì, chì u mio cavallucciu Gimnasticu per esempiu, quand'ellu hè strufinatu incu a paglia, pettinatu bè è chì a so chjoma hè intricciata di carta d'argentu, hè più felice chè quand'ellu hè cupertu di cacatu. È sò dinù chì u giardinu Mustaccione, face surrisi à l'arburri quand'elli sò tagliati bè. Un hè ordine què ?

Issa risposta ùn parse suddisfà u Sgiò Trunadisce. E so arechje turnonu ancu di più rosse.

– È di quelli chì sumenanu u disordine, chì ne femu ? Dumandò quellu.

– Devenu esse puniti, rispose Tistù chì pensava chì « suminà u disordine » era appena cum'è « suminà e so ciavatte » in camera o « suminà i so ghjoculi » in lu giardinu.

– I mettimu in prigiò quì, dichjarò u Sgiò Trunadisce mustrendu à Tistù un muraglione

grisgiu, senza mancu una finestra, un muru chì ùn paria nurmale.

– Ghjè què, a prigiò ? Disse Tistù.

– Ghjè què, disse u Sgiò Trunadisè. Ghjè u munimentu chì ghjova à mantene l'ordine.

Custighjonu u muru, è ghjunsenu davanti à una griglia nera arriciata di punte di ferru. È daretu à a griglia nera, omu vidia altri cateri neri, è daretu à u muru tristu, d'altri muri tristi. E tutti sti muri è tutti isse griglie eranu dinù accimati di punte di ferru.

– Cumu hè chì u muratore hà messu tutte ste pessime punte da per tuttu ? Dumandò Tistù. A chì ghjova ?

– À impedisce i prigiuneri di scappà.

– S'ella era menu goffa sta prigiò, disse Tistù, forse ch'elli averianu menu laziu di scappà.

E maschette di u Sgiò Trunadisè turnonu rosse quant'è e so arechje.

Pensò, « stranu zitellu, a so educazione sana hè da fà ? »

È à voce alta aghjustò :

– Duverie sapè chì un prigiuneru hè gattivu omu

– U mettimu quì per guariscelu di a so gattivezza allora ? disse Tistù

– U mettimu quì per impediscelu di nuce à l'altri.

– Guarisceria sicuramente più prestu si u locu era menu goffu, disse torna Tistù.

« O ! hè chjucutu » pensò u Sgiò Trunadisse. Tistù vide daretu à e griglie i prigiuneri chì marchjavanu in tondulu, capi ghjimbi, senza anscià mancu una parulla. Parianu spaventosamente tristi, capi rasati, i so panni rigati è i so scarponi.

– Chì facenu quì ?

– Sò in recreziò disse u Sgiò Trunadisse.

« Ebbè da veru ! s'ella hè què a so recreziò, chì saranu po e so ore di scola ! in veru, sta prigiò era troppu trista. »

Li venia u pientu, è ùn disse mancu una parulla tutta a strada di u ritornu. U Sgiò Trunadisse pigliava issu silenziu cum'è una bona, è pensava chì a lezziò d'ordine avia fattu e so prove.

E puru, scrisse in lu carnettu di note di Tistù :
Stu zitellu hè da curà da vicinu, si pone troppu dumande.*

* surveiller